

ЎЗБЕКИСТОН РЕСПУБЛИКАСИ
МАДАНИЯТ ВА СПОРТ ИШЛАРИ ВАЗИРИНИНГ
БУЙРУҒИ

113 Футбол бўйича спорт мусобақаларини ўтказиш вақтида томошабинларнинг (мухлисларнинг) ўзини тутиш қоидаларини тасдиқлаш ҳақида

Ўзбекистон Республикаси Адлия вазирлиги томонидан 2013 йил 22 февралда рўйхатдан ўтказилди, рўйхат рақами 2430

«Жисмоний тарбия ва спорт тўғрисида»ги Ўзбекистон Республикасининг Қонуни (Ўзбекистон Республикаси Олий Мажлисининг Ахборотномаси, 2000 й., 5-6-сон, 147-модда) ва Ўзбекистон Республикаси Вазирлар Маҳкамасининг 2003 йил 13 январдаги 15-сон «Оммавий тадбирларни ўтказиш қоидаларини тасдиқлаш тўғрисида»ги қарорига (Ўзбекистон Республикаси қонун ҳужжатлари тўплами, 2003 й., 1-2-сон, 10-модда) мувофиқ, шунингдек футбол бўйича спорт мусобақаларини ўтказишда жамоат хавфсизлигини таъминлаш мақсадида **буюраман:**

1. Футбол бўйича спорт мусобақаларини ўтказиш вақтида томошабинларнинг (мухлисларнинг) ўзини тутиш қоидалари иловага мувофиқ тасдиқлансин.

2. Мазкур буйруқ расмий эълон қилинган кундан эътиборан кучга киради.

Вазир

Т. КУЗИЕВ

Тошкент ш.,
2013 йил 22 февраль,
162-сон

Ўзбекистон Республикаси
маданият ва спорт ишлари вазирининг
2013 йил 22 февралдаги 162-сон буйруғига
ИЛОВА

Футбол бўйича спорт мусобақаларини ўтказиш вақтида томошабинларнинг (мухлисларнинг) ўзини тутиш ҚОИДАЛАРИ

Мазкур Қоидалар «Жисмоний тарбия ва спорт тўғрисида»ги Ўзбекистон Республикасининг Қонуни (Ўзбекистон Республикаси Олий Мажлисининг Ахборотномаси, 2000 й., 5-6-сон, 147-модда) ва Ўзбекистон Республикаси Вазирлар Маҳкамасининг 2003 йил 13 январдаги 15-сон «Оммавий тадбирларни ўтказиш қоидаларини тасдиқлаш тўғрисида»ги қарорига (Ўзбе-

Ўзбекистон Республикаси қонун ҳужжатлари тўплами, 2013 й.

кистон Республикаси қонун ҳужжатлари тўплами, 2003 й., 1-2-сон, 10-модда) мувофиқ, Ўзбекистон Республикаси ҳудудида жойлашган спорт иншоотларида футбол бўйича спорт мусобақалари ва томоша тадбирларини ўтказиш вақтида томошабинларнинг (мухлисларнинг) ўзини тутиш тартибини белгилайди.

I боб. Спорт иншоотига кириш вақтида томошабинларнинг (мухлисларнинг) ўзини тутиши

1. Спорт иншоотига кириш вақтида томошабинлар (мухлислар):

чиптага асосан спорт иншоотига кириш ва жойлашиш;

спорт иншооти ҳудудида жойлашган сақлаш камералари, буфет, кафе ҳамда ташкилотчилар ва спорт иншооти маъмурияти томонидан тақдим этилган бошқа хизматлардан белгиланган тартибда фойдаланиш;

пластик сурнайлар, дастаси пластикдан бўлган байроқчалар, дастаси йўқ байроқлар, фотоаппаратлар, мобиль телефонларни спорт иншоотига олиб кириш ҳуқуқига эга.

2. Мухлисларнинг гуруҳларига спорт иншоотига ичи кавак (телескопик) дастали байроқларни ва барабанларни олиб келишга рухсат этилади. Бунда байроқнинг максимал ҳажми — 1 х 2 м, дастасининг максимал узунлиги — 1,2 м бўлиши керак.

3. Мухлисларнинг гуруҳлари спорт иншооти маъмурияти ва ҳуқуқни муҳофаза қилиш органларининг масъул ходимлари билан келишган ҳолда катта футболка ва байроқларни бўш секторлар ва югуриш йўлакчаларига жойлаштириш, тўсиқларга баннер-транспарантларни осиб қўйишлари мумкин. Катта футболка, байроқлар, баннер-транспарантларда ҳақоратли ёзувлар, шунингдек қонун ҳужжатлари талабларига зид бошқа ёзувлар бўлмаслиги керак.

4. Томошабинлар (мухлислар):

спорт иншоотига кириш жараёнида махсус назоратдан (текширувдан) ўтиш вақтини ҳисобга олган ҳолда спорт иншоотига тадбир бошлангунга қадар келишга;

спорт иншооти маъмурияти ва ҳуқуқни муҳофаза қилиш органлари ходимларига чипталар, таклифномалар ёки тадбирга кириш ҳуқуқини берадиган рухсатномаларни кўрсатишга ҳамда уларнинг хавфсизлик ва тартибни сақлаш бўйича қонуний талабларини бажаришга мажбур.

5. Томошабинлар (мухлислар) спорт иншоотига кириш чоғида ҳуқуқни муҳофаза қилиш органлари томонидан махсус назоратдан (текширувдан) ўтказилади.

6. Томошабинларга (мухлисларга) қуйидагилар тақиқланади:

маст ҳолда спорт иншоотига кириш, спиртли ичимликларни олиб келиш, тамаки маҳсулотларини ёки бошқа маст қилувчи воситаларни спорт иншооти ҳудудида истеъмол қилиш;

ўзи билан ўқ отар қурол, тез ўт оладиган, портловчи, захарли, пиро-

техник, ўткир хидли моддаларни, санчадиган ёки кесадиган предметлар, чемоданлар, портфеллар, катта ўлчамдаги ўрамлар ва сумкалар, шиша идишларни, шунингдек бошқа томошабинларга ва тадбир ўтказишга халал берувчи бошқа буюмларни олиб келиш;

юз ёки тананинг бошқа қисмларини бўйяш;

тадбирга жониворлар билан келиш;

миллий, ирқий, этник ёки диний адоватни қўзғашга қаратилган, тадбир иштирокчилари ва бошқа томошабинларни ҳақорат қиладиган белги ёки тимсол ва ёзувларни олиб юриш ёки очиқ намоёйиш этиш;

тадбир иштирокчиларининг кадр-қимматини камситувчи хайқириқлар ёки ҳаракатлар қилиш.

7. Агар меҳмон жамоа мухлисларининг жойи учрашувни қабул қилаётган жамоа мухлислари тарафида бўлса, спорт иншооти маъмурияти ва ҳуқуқни муҳофаза қилиш органлари ходимлари хавфсизликни таъминлаш мақсадида учрашувни қабул қилаётган жамоа мухлисларидан меҳмон жамоа мухлислари учун мўлжалланган секторга ўтишни талаб қилиши мумкин.

II боб. Футбол бўйича спорт мусобақаларини ўтказиш вақтида томошабинларнинг (мухлисларнинг) ўзини тутиши

8. Футбол бўйича спорт мусобақалари ўтказиладиган вақтда томошабинлар (мухлислар):

ноқулай об-ҳаво шароитида жамоани турган ҳолда қўллаб-қувватлашлари; фото ва видеосъёмкани амалга оширишлари;

ўйин вақтида жамоани фаол ва уюшган ҳолда қўллаб-қувватлашлари;

қўллаб-қувватловчи шиор ва чақириқлардан фойдаланишлари;

футбол ва унинг натижаси билан боғлиқ ахборот олиш ҳуқуқига эга.

9. Футбол бўйича спорт мусобақалари ўтказиладиган вақтда томошабинлар (мухлислар):

жамоат тартиби ва ахлоқ нормаларига риоя этишлари;

спорт иншоотининг жиҳозларига эҳтиёткорлик билан муносабатда бўлишлари;

ёнғин хавфсизлиги қоидаларига амал қилишлари;

бошқа жамоаларнинг мухлисларига нисбатан қўпол муносабатда бўлмасликлари;

бошқаларга нисбатан ҳурмат билан муносабатда бўлишлари, атрофдагиларга хавф соладиган ҳаракатларни содир этмасликлари;

шубҳали предметлар ва буюмларни кўрганда, шунингдек тутун ёки ёнғин содир бўлганда зудлик билан спорт иншооти маъмурияти ёки ҳуқуқни муҳофаза қилиш органлари ходимларига хабар беришлари;

фавқулодда вазиятлар юзага келганда тартибни сақлашга масъул бўлган шахслар кўрсатмасига асосан ҳаракат қилишлари;

давлат рамзларига, шунингдек Ўзбекистон Футбол федерацияси, Ўзбе-

кистон Профессионал футбол лигаси, клублар ва жамоаларнинг раҳбарларига ҳурмат билан муносабатда бўлишлари шарт.

10. Футбол бўйича спорт мусобақалари ўтказилаётган вақтда томошабинларга (мухлисларга) қуйидагилар тақиқланади:

турли буюмларни футбол майдонига, футбол мусобақаси иштирокчиларига қараб улоқтириш,

машғала ёки гулханлар ёқиш;

футбол майдонига чиқиш, жамоалар, ҳакамлар, мураббийлар ва захира ўйинчилар жойлашган жойга, допинг назорати хонасига, расмий шахслар учун мўлжалланган хона ва VIP-ложгага ёки стадионнинг бошқа махсус хоналарига кириш;

ўтиш жойларида, зиналарда ёки люкларда туриш, иштирокчилар ва томошабинларнинг (мухлисларнинг) ҳаракатларига ҳалал бериш, ўриндиқ устига чиқиб олиш, тўсиқ ва панжараларга осилиш, ёритиш қурилмаларига, мачталар, қимирламайдиган конструкцияларга чиқиш, спорт иншооти мулкига зарар етказиш.

III боб. Футбол бўйича спорт мусобақалари якунига етганидан кейин томошабинларнинг (мухлисларнинг) ўзини тутиши

11. Футбол бўйича спорт мусобақаси якунига етганидан кейин томошабинлар (мухлислар) спорт иншоотидан чиқиб кетиш тартиби тўғрисида аҳборот олиш ҳуқуқига эга.

12. Футбол бўйича спорт тадбири якунига етганидан кейин томошабинлар (мухлислар) белгиланган тартибга риоя қилган ҳолда спорт иншоотини тарк этишлари шарт.

13. Футбол бўйича спорт мусобақаси якунига етганидан кейин томошабинлар (мухлислар)га қуйидагилар тақиқланади:

спорт иншооти ёки клуб маъмурияти вакилисиз майдонга чиқиш, шунингдек спортчиларнинг кийим алмаштириш хоналарига, ҳакамларнинг ҳамда бошқа хизмат кўрсатиш хоналарига кириш;

бошқа шахсларнинг мулкига зарар етказиш;

футболчилар, мураббийлар ёки томошабинларга, шунингдек уларнинг транспорт воситаларига буюмлар улоқтириш.

IV боб. Якуний қоидалар

14. Мазкур Қоидаларнинг талабларига риоя этмаган ёки унга бўйсунмайдиган бош тортган шахслар спорт иншоотига қўйилмайдиган ёки чиптанинг ҳақи тўлаб берилмасдан мусобақадан четлаштирилади.

15. Мазкур Қоидаларнинг талаблари бузилишида айбдор бўлган шахслар қонун ҳужжатларида белгиланган тартибда жавобгарликка тортилади.

113-114-моддалар

— 118 —

8 (560)-сон

16. Мазкур Қоидалар Ўзбекистон Республикаси Ички ишлар вазирлиги ва Ўзбекистон Футбол федерацияси билан келишилган.

Ички ишлар вазири

Б. МАТЛЮБОВ

2013 йил 21 февраль

*Ўзбекистон Футбол
федерацияси президенти*

М. УСМАНОВ

2013 йил 21 февраль